


**ALTI HAIMELIGI  
VERSCHNUUFFER**

## D Dalbe wird esoterisch

D Dalbe isch ehnder e ruehigi Schtrooss,  
e weneli Verkehr, suscht isch gar nüt loos.  
E bitz vom Daig sin d Bewohner,  
s het aber au no e baar Floohter.  
Alles wurd wyterlaufe in gwohnte Baahne,  
doch jetzt isch d Rueh verby, nundefaane.  
Wie wenn aine hätt am ene Schalter drüllt,  
d Dalbe wird in e mega Liecht yghüllt,  
natuurwisseschaftlig nit bewiise, halt,  
e Seher, Woohrsaager und Liechtgeschalt  
zieht in Goldige Leue y, mit sym Hündli,  
kai Problem, by däm Honorar pro Schtündli.  
Dr ney Nochber isch e männligi Diva,  
Scheff vom Übersinnlige, dr Mike Shiva.



S Saniteetsdepartemänt schoot au in däm Schtraahl,  
mit ihrem Scheff, dä stellt sich jo zer Widerwaahl,  
dr Carlo Conti losst sich vom Shiva d Karte lääse,  
wie s schoot um s Basler Gsundhaitswäase.  
Es blooge ihn die kaibe Fallpauschale,  
wär aigentlig ka das alles zaahle?  
Worum dien d Gsundhaitkeschte us em Rueder laufe?  
Soll Basel au no s Bruederholzspittel kaufe?  
Dr Mike git em e guete Root,  
wyl s nämmlig eso in de Karte schoot.  
Carlo due doch s Mässer wetze,  
due s näggscht Joohr dr Guy Morin ersetze.  
Denn hätsch, drum gib s doch ändlig zue,  
vo Bette-Zaahle, Fallpauschale Rueh.

**Dr Michel, das heert me jetze saage,  
haig Zyt, und wurd in dr Dalbe d BAZ vertraage.**

Zem Hoche Dolder, dä vornäähmi Verein,  
e baar Dalbaneese, u.a. dr Oeri Hein(er),  
hän sich neyi Schtatute gä,  
s isch aifach gsi, si sin jo numme zäh.  
Artiggel eins: mir schrybe s uff d Faahne,  
d Zuekunft dien mir mit em Shiva plaane.  
Artiggel zwai: esoterisch wän mir wyterläbe,  
magisch dien mir umme schwäbe.  
Artiggel drey: mir sin lieb mitenand,  
göhn zämme dur s Läbe Hand in Hand.  
Artiggel vier: mir sin aaschtändig und Sorge drfür,  
ass jede zerscht wüschd vor dr eigene Tür.  
Artiggel fünf: mir glaube an d Taarot-Karte,  
Jede wirft em Andere emol e Schtai in Garte.  
Artiggel säx: ass dr Verein nit ka verlumpe,  
duet dr Mike in d Lugge gumppe,  
4 Frangge 50, s Minute Honorar,  
10 Prozänt drvo, in die aige Kasse, klar?

**Pändle, pändle, das ganz heggtrisch,  
macht dr Gebhardt jetzt eleggrisch.**

Dr Andreas Plüss vom Dalben Eck  
verzellt im ene Interwiu, sehr segg,  
dr Mike Shiva und sy Trubbe  
grieger vo mir jede Daag e Subbe.  
Ar findet die Geste nämmlig toll,  
denn jetzt isch amme d Bude voll.  
D Dalbeneese hän dr Mike so gärn,  
dr Obelix vom Eck träumt vom ene Stärn.  
Michelin oder Pünggt vo Gault Millaut  
baides wurd passe, so oder so.

**In dr Dalbe, schtatt e neyi Haizig kaufe,  
dien si iber glichigi Koohle laufe.**

Was soll dä Rummel und das Gschrey?  
TV-Sändige, Woohrsaagerey,  
isch doch alles Gschäftlimacherey.  
Mike, due doch d Politigger beroote,  
ass si nimm so liege dien, nach Noote.  
Und iberhaupt, dä ganzi Firlufanz  
intressiert vo uns kai Schwanz.

---

D Ladäärne-Uusstellig uff em Minschterplatz und d Waage- und  
Reggwisyte-Uusstellig bi dr Kasäärne sinn vom Mäntig znacht  
bis am Mittwoch demorge, 27. bis 29 Hornig. Dert ka men au  
alli Zeedel und Schnitzelbäng, d Blagedde und dr Rädäbäng  
kaufe. Wotsch drummlle oder pfyffe bi unsere Junge, ob Bueb  
oder Maitli – bi de Gnepf bisch willkommen!  
Uuskunft git: gnepf@verschnuuffer.ch

**NEU:** Am Sunntig, 4. März isch d'Zeedelläasete  
vo 17 – 19 h im Meriansaal vom Hotel Merian/KaffiSpitz;  
dr Ytritt isch vergäbe, Getränkebuffet in dr Pause.